

Misnia.

444

Regio & unde dicta.

Situs.

*Cosli qualitas.
Soli fertilitas.*

Imperium majorum.

Urbes.

*Flumina.
Silva.
Vulgi mores.*

Misnia Meyssen, Superioris Saxoniae Regio inter Salam & Albim posita, a Mesia Lacu, ad quem olim fortasse ejus Incolae habitaverunt, aut a Misna Urbe, nomen accepit, cui opinioni Rithaimerus in sua Orbis descriptione libentius accedit. Verum recentior hoc nomen regioni inditum est, cum Hermundurorum hic olim sedes fuisse colligere liceat ex Tacito: nam in Hermunduris Albim nasci memorat. Terminatur ad Septentrionem Marchia Brandenburgensi & Superiori Saxonia: ad Orientem Solem utraque Lusatia ac Silesia: Qua Meridies est Bohemiae Regnum ac Sudetos montes respicit: qua Occidens Turingiam vicinam habet. Aer olim vix ferendus fuisse dicitur ob Montium Silvarumque humidas exhalationes, nunc vero silvis excisis cessant nebulae, unde Aere hodie salubriori fruitur. Regio omni Frugum genere fecunda est, ut toti fere circumjacenti regioni ad abundantiam sufficiat. Summa est ubique non modo Frumenti fertilitas: verum etiam Vini, Mellis, Pecorisque copia: praeterquam in Valle Ioachimica, ubi gleba durior & minus fertilis est. Sed quod superficie ejus denegatur, id ejus viscera abunde compensant: Argentum enim sunt ibi divites admodum Fodinæ. Metalla insuper varii generis in Montibus passim generat, Argentum, Aes, Stannum, Ferrum, Plumbum: atque alibi etiam Aurum. Tempore Ottonis Magni, Regio hæc una cum Turingorum & Superioris Saxoniae terris, appellata fuit Marchia Saxoniae, antequam videlicet Ducatus Superioris Saxoniae erigeretur. Deinde successu temporum fuerunt hæc terræ & regiones in plura Dominia divisæ, ac postea rursus sub unam denominationem atque Dominationem redactæ: quemadmodum contigit anno CIOCCXII, quando Princeps Landgraviatus Turingensis sine prole mortuus, per mulierem ditionem suam transmisit ad Dominos Misnenses, qui ab eo tempore utrumque adepti titulum, & Marchiones Misniae & Landgravii Turingiae dicti sunt. Anno quoque Domini CIOCCXXXII deficiente virili successione Principis Electoris Saxoniae, Sigismundus Imperator tradidit Ducatum Saxoniae Principibus Misniae, quem & in hunc usque possident diem, & ab illo tempore triplicem sibi usurpaverunt titulum: ut scribit Munsterus. Urbes Misniae multæ: primaria est *Misena* ad lævam Albis ripam, exstructa ab Ottone I. Proxima *Dresdena* situ valde jucundo, & contra hostium incursiones probe munita. Hic armamentarium est Ducis Saxoniae, est & aula ejus magnifice exstructa, & pons è saxo admirandi operis. *Lipsia* Emporium celebre, ad Pleissenam amnem sita reliquas omnes Misniae Urbes opulentia & splendore antecellit: hic nobile est litterarum & sapientiae Gymnasium, quod rebus Pragæ conturbatis eo translatus est, anno CIOCCCVIII. In eodem tractu sunt *Ilzenburgum*, *Antiqua cella*, *Lauterbergum*, & alia Opida. Fluminibus rigatur hæc regio *Albi*, *Sala*, *Mulda*, & aliis: ac Silvis quoque undequaque conspersa, Gabretæ ac aliis plerisque Hercyniae portionibus. Hodierni Incolae robusti, fortesque, ac commendanda corporis forma, ac proportionem, jucundi, hilares, amici, modesti, pacis amantes, nulla in parte Germanorum innatam feritatem ac immanitatem referentes.

Lusatia